



UPA 2019/193: Piniakkanik killilersukkanik ukiumi pisassiiffiusumi Qilalukkanik qernertanik Qilalukkanik qaortanik aammalu Nannunik, ukiup qaammataani qaammatit marluk December-imi Januar-milu pisassiiffiuunnaartinneqarnissaannik Naalakkersuisut peqquneqarnissaannik inatsisartut aaliagiiffigisassaattut siunnersuut. (Inatsisartunut ilaasortaq Karl-Kristian Kruse, Siumut)

11. april 2019

UPA2019/221

Piniakkat killilersukkat Avandersuarmi Ittoqqortoormiinilu qilalukkut qernertat qaortallu, aaveq aamma nanoq pillugit periarfissaqarnersoq misissuisoqassasoq, kiisalu sunik suliniutinik killilersuisoqarunnaarnissa pillugu Naalakkersuisut UPA2020-imut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Napätk', Partii Naleraq

Inatsisartunut ilaasortat marluk Karl Kristian Kruse Siumut, aammalu Jens Napätk', Partii Naleraq siunnersuuteqarput Piniakkanik killersukkanik inatsisartunut saqqummiussaqarlutik.

Tamannalu Partii Naleqqamiit oqaaseqarfigissavarput.

Oqaluttuuarisaaneq inuianni kingumut qiviarlugu malinnaaffigigaanni nunatsinni piniagassarpassuit ajuusaarnarluinnartumik nunani allamiunik nungugajalluinnarneqarsimapput, ilaatigullu nungulluinnarneqapajaarsimallutik, imatullu sunniuteqapilunnikuullutik ukiorpassuarni uagutsinnut inuiannut kalaallinut inuuniarnikkut equinerlorujussuarsimallutik, uffalu itsaaniilli nerisaralugillu inuuniutigigigut. Sulilumi ullumikkut inuuniutigaagut nerisaralugillu.

Arferpassuit aalisagarpassuit nunani allamiunit piniapilunneqarsimaqaat, ilami qilalugarpassuit oqarluannaraanni KGH-imik nungunneqapajaarsimapput, ungoorilluni qassussuarnik piniarneqartarlutik, orsuinillu europami aqquserngup qullit qaammarsaallutik ikumaniaassammata.

Nunatsinni piniarnikkut atugassarititaasut pillugit tupinnanngitsumik ukiuni kingullerni assut aalassassutaasunik oqallittarnerit sakkortuumik ingerlanneqartarput, tamannami tupinnarpallaanngilaq, inuuniuteqartummi amerlanerpaat tassaapput aalisartut piniartullu ilaqtariippassuarnik tunngavillit.

Inuaat kalaallit ukiorpassuarni ulluinnarni neqissaqarniarnermi tunngavigaagut piniakkagut, puisit, nannut, arferit, qilalukkut, tuttut, timmissat, aammalu nersutaatillit uumasuutilillu nunatsinni ingerlassaat piaqqiortitaallu, taamaattumik ulluinnarni inuuniarnerput amerlasoorpassuartigut neqimik tunngaveqarpoq, pingaartumik piniartoqarfut nunaqarfut isorliunerusullu eqqarsaatigalugit.

Kaperlaap nalaani pingartumik avannaarsuani piniartut inuuniutiminnik ingerlatsissagunik ulluinnarnilu inuuniarnertik isumannaannerussappat pinngitsorsinnaanngilaat qimuttunik qimmeqarnissartik.

Qimmit ukioq tamaat nerukkaatissqarnissaat pingartumik kaperlattartumi pinngitsoorneqarsinnaanngilaq. Issittorsuarmi qimuttunik qimmeqarneq ingerlassappat ingerlaannassappallu taava naleqquttunik kimittuunillu qimminut nerukkaatissaqarneq pinngitsoorneqarsinnaanngilaq.

Pingartumik avanersuarmi aarrit qimminut nerukkaatissatut pinngitsoorneqarsinnaanngillat, soorunamilu inunnut neqissaqarniarnermut pingaruteqarluinnartut aamma eqqarsaatigalugit.

Taakkuinnaangillat aamma ukiorpassuarni issittumi najugaqarnerminnut angalasinnaanerminullu atisat oqortut pisariaqartinneqartuartussaapput, soorlu nannut amii, teriannissat tuttullu amii, taamaattumik aamma nannunniarnerminni killilersuinermi killiliinerit sakkortuallaarneranni piniartut ilaquaasalu eqqorneqarsimanerat ilanggullugu nalilersortariaqarparput.

Nunatta kangiani piniartut piniarnikkut annerpaamik aamma inuuniuteqarput, aalisarneq allanisulli suli tamakkiisumik inuuniutigineqanngilaq, piniarnermillu inuussutissarsiuteqarneq Ittoqqortoormiini, aammalu Tasiilaq eqqaani, nunaqarfittaanilu, annertunerpaamik tunngaviuvoq tassalu piniarneq.

Taamaattumik aamma ingasattajaarluta kangiani killilersuinerput nalilersortariaqarparput. Inuimmi inuuniutaat ingasappallaamik killilersorsinnaanngilagut, ilaquattaminnut napatitsinnissaq inuussutissaqtitsinissarlu inuup pisinnaatitaaffigimmagu, pingartumik ilaqtariit piniarnerinnamik inuussutissarsiuteqartut eqqarsaatigalugit.

Tassami assersuutigalugu pinngortitami peqqarniinnerpaami inooqataasunut ullut tamaasa piniarfiusinnaanngitsumi tassalu nunatta kangiani neqissaqarnikkut pisariaqartitsineq ilaqtariit ulluinnarni inuunerannut pingartorujussuummat pisariaqartinneqarlunilu.

Kitaanisulli neqissarniarnikkut pissutsit pitsaatiginngimmata aammalu aalisarnikkut suli annerusumik alloriartoqarnikuunani taamaattumik tupinnanngitsumik qilalukkanik nannunillu amerlanerusunik pisassinneqarnissartik ullut tamaasa kissaatigaat, inuuniarnikkut neqissaqarniarnikkullu pisinnaatitaaffiagaasutut misigisimancerat malunnarluarmat.

Tassami assersuutigalugu, sumiiffinni nannut ullut tamaasa isigaat, ilaatigullu illoqarfinnunut nunaqarfinnullu pulagaangata toqqisisimajunnaavittarlutik, nanormi umasuuvvoq qaasuttoq piniakkaminik inuussuteqartut qungasiatigut pituinnarlugu illut akornanni tasikkumiagassaanngitsoq.

Naalakkersuisut akissumminni tunngavilersutaat isumaqatiginngilarput, tassalu Avanersuarmi Tunumilu piniartut piniakkaminik atorluanngitsutut taallugit akissuteqarmata.

Issuaaneq "Naalakkersuisut erseqqissaatigissavaat Avanersuarmi umimmannik nannunnik, qilalukkanik qaqortanik, qilalukkanik qernertanik, aavernillu pisassiissutit sinneqarmata. Tunumi umimmaat, aavernik tikaagullinnillu sinneqarput, Kalaallit Nunaata Kitaani qilalukkanik

qaqortanik, qilalukkanik qernertanik, aavernik, nannunik, tikaagiulliusaanik, qipoqqanik arfivinnillu pisassiissutit sinneqarput. Sumiiffimmi tassani piniartut taamaalillutik isertitassaqarfinnik neqitigullu pilersuinissamut periarfissanik atorneqanngitsunik arlalinnik peqaraluarpuit atorluarnerusinnaasaminnik” issuaaneq naavoq.

Tunngavilersuutit taakkua atorsinnaanngillat sumiiffikkaarlugit piniarfissat pisassallu aalajangersugaapput, oqaannartoqarsinnaanngilarmi piniartut neqissaqarniarkkut tamakkiisumik atorluanngitsut, pisaqarsinnaanermut akuersisummik peqanngikkaanni, ilami allagartaq nassanngikkaanniluunniit pisaqartoqarsinnaanngilaq, Arferit anginerit immikkut malittarisassaqarput ilami tamarmik oqaannarluni pisarineqarsinnaanngillat.

Namminersornerup equnniarnerani isumaliutissiissut imatut aamma allaqavoq”Aalajangersarneqassaaq inuiaat kalaallit Kalaallit Nunaata nunartaani imartaanilu pinngortitami pisuussutinut tamanut piginnittuusut”

FN-mi nunat akornanni isumaqatigiissummi artikeli 1-mi aalajangersarneqarpoq inuiaat tamarmik imminnut aalajangersaaffigisinnaasut aammalu tamanna tunngavigalugu naalakkersuinikkut inisisimanertik killilerneqaratik aalangersarsinnaagaat taamatullu namminneq aningaasaqarnikkut, inuit atugaasigut kulturikkullu piorsaanertik killilerneqaratik isumagisinjaagaat. Taamatuttaaq aalajangersarneqarpoq inuiaat tamarmik siunertarisaminnut atatillugu pinngortitamit pisuussutiminnik isumalluutinillu killilerneqaratik atuisinnaasut nunat tamalaat akornanni suleqatigiinnertigut illugiimmik iluaquteqarsinnaanermik tunngavissaqartumik naalagaaffiit innuttanut pisussaaffiinut tassuunakkut killiisussamik iliuseqanngikkaluarluni. Inuiaat aalajangersagaq malillugu piujuannarsinnaanissaminnik arsaagaasinnaanngisaannassapput”

Siunnersuuteqartut tunngavilersutaat Karl Kristian Kruse Siumut, taavalu Jens Napaattooq Partii Naleraq, siunnersuutaat isumaqatigalugit ataatsimiititaliami suliarineqarnissaat innersuussutigaarput.

Hans Enoksen

